

李文忠公朋僚函稿

李文忠公朋僚函稿篇目

桐城吳汝綸編輯

卷第十七

正月六日復沈幼丹節帥

光緒元年

正月七日復錢調甫中丞

光緒元年

正月八日復劉仲良中丞

光緒元年

正月十日復郭意誠中書

光緒元年

正月十四日復丁雨生中丞

光緒元年

正月十五日復王補帆中丞

光緒元年

正月二十日復丁稚璜宮保

光緒元年

二月十日復鮑花潭中丞

光緒元年

三月六日復潘琴軒方伯

光緒元年

三月二十六日復馮卓儒觀察

光緒元年

四月三日復陳荔秋北部

光緒元年

四月十五日復沈幼丹節帥

光緒元年

四月十九日致曾勛剛襲侯

光緒元年

四月二十日致彭雪琴宮保

光緒元年

四月二十九日復沈幼丹制軍

光緒元年

五月一日復英西林宮保

光緒元年

五月八日致沈幼丹制軍

光緒元年

五月二十六日復潘琴軒方伯

光緒元年

六月二十一日復劉峴帥

光緒元年

七月六日致劉峴帥

光緒元年

七月十八日復英宮保

光緒元年

七月十九日復沈幼丹制軍

光緒元年

七月二十一日復郭筠軒廉訪

光緒元年

七月二十五日復丁稚璜宮保

光緒元年

八月一日致郭筠仙欽使

光緒元年

八月四日復王補帆中丞

光緒元年

八月十三日復劉仲良中丞

光緒元年

八月二十三日復潘琴軒方伯

光緒元年

八月二十九日復沈幼丹制軍

光緒元年

十月二十三日復翁玉甫中丞

光緒元年

十月二十四日復王補帆中丞

光緒元年

十一月十八日復曾沅浦宮保

光緒元年

十一月十九日復沈幼帥

光緒元年

十一月二十四日復沈幼帥

光緒元年

十二月四日復郭意城內翰

光緒元年

李文忠公朋僚函稿卷第十七篇目終

李文忠公朋僚函稿卷第十七

桐城吳汝綸編輯

正月六日復沈幼丹節帥

光緒元年

覆陳海防疏條條實對兵船一節尤探討入微自道甘苦欽伏莫名統帥乃推及不才皇悚萬狀公自謂於船政一無所知謬謙過分弟於海防則真一無所知矣冬月初曾披拾上陳毫無是處久思錄呈苦無確便茲謹鈔奉教正其推戴執事實出至誠非敢互爲標榜也劉張諸君條議各有見地張更精覈故知幕下人才濟濟非他處捕風捉影者所可幾及巡撫移臺之議洵屬經久大計年前赴京叩謁梓宮曾力陳於當路聞吏部主稿覆准小小節目尙須閩中裁定耳各省覆奏尙未全到國有大事暨無暇及今春再從容會核然南洋數省提挈綱領舍我公其誰與歸日意格所開鐵甲船價已得大概尊意令其回國購機器之便再順途細訪

詳確開示何時可以成行前議帶生徒工匠前往學習造駛能及時一併籌辦否文相急欲購辦守口小鐵船屬赫德由電信問價據云每船連礮在英廠定造約價十餘萬及二十數萬不等擬令赫稅司來津會議如有成局容再奉聞召民北行有日否敝處相需甚迫難再濡緩乞公再加函催否則弟須奏請也荔秋已由美回京議辦古巴招工一事尙無端緒其人誠慤可靠而權略不足軍事稍生亦垂垂老矣劉蘭舟官浙有聲家兄亟稱其賢惜未見過執事如量移江左是好幫手唐俊侯書來所部弁勇爲瘴癘所侵物故甚多求於礮臺工竣後內渡弟屬其須隨節戎爲進止該軍轉運糧餉軍火乞常派一船往來滬揚以通氣脈爲幸台從何日回廠仍向東瀛否弟須春分後赴津也 太后垂簾屬精圖政目前覬倖太平知念附及

正月七日復錢調甫中丞

鴻章備位近畿 國有大事不得不籲准奔赴二十一日抵京二十二
召見後卽叩謁 梓宮嗣後隨班行初祭大祭禮奉 太后面諭回省度
歲以資鎮撫當卽 陛辭於二十七出京元日旋省倥傯之際仰見 兩
宮於悲痛迫切之中有厲精圖治之意親賢夾輔翊贊同心新政數大端
整綱肅紀犁然各當實足固根本而定民志似不至再有意外之變尊虛
中原腹地空虛擬埃河州事定將宋祝三一軍調回豫境作大枝活兵以
備四路援應閒中著子意至善也西域糧運過艱金張額三軍已恐接濟
不及宋軍徘徊隴上久成贅疣若由尊處審度局勢抗疏直陳以省殺軍
裹帶供諸軍飽騰爲阿諛可仰邀 俞允鴻章前於議覆海防疏內曾力
陳關外祇宜屯墾緩進不宜添兵大舉致令饑潰 廷臣頗有聽是言者
聞彼午與左相意見不協有自募數營赴哈密籌糧餉之疏是隱以軍事
自任必挈張宋以隨當軸欲爲調停而苦無決斷惜在京時未知台端調

宋軍之說不及預爲道地耳 內意於西事欲罷不能究亦毫無主見乘機進言無論准行與否而事理所在疆吏當斷斷持之且豫庫竭蹶如此豈能分供兩軍之遠役宋同固爲活兵如時局大定仍可酌量裁減勻出活餉行止惟執事裁酌

正月八日復劉仲良中丞

敵處覆議海防一疏實緣身任其事不得不斟酌時勢啓發噴聾明知當世人才不能准行亦斷不能辦到但既灼見真知亦須留此空言以待後之作者庸衆無識橫加訾議固無足怪執事從軍數年當有閱歷洋務卽毫無探討事理當畧加揣度乃猶大肆鑼鼓實出期望之外茲姑就閣下所疑議數端一爲決正西師不撤斷無力量兼謀東南此所已知者也又謂祇可議令減兵縮餉剋期蕝事夫添兵添餉必不能剋期蕝事三尺童子當共喻之今既減兵又縮餉而仍責其剋期此期惟執事久充統領者

可剋 廟謨帥令恐未便操切若作剋期歲事之空文虛願欺人乎自欺乎敝疏本有慎守現有邊界且屯且耕之語非盡撤也亦非舉玉門以外棄之也所述曾文正暨棄關外之議卻非正筆何未看清文義遂下斷語吾謂新疆不可復嫌於墮地尊意豈料新疆必可復耶復之必可守耶此何異盲人坐屋內說晴話我既知其不可復不可守自應預作一自守之謀屯守現有邊界卽是杜俄人蠶食屏蔽西北各城及內地也現卽不議減兵縮餉亦不過做到如此地步決大計大疑豈容稍涉虛飾耶煤鐵爲船礮必需可以開挖此所已知者也何以樂平煤鐵官場合力阻撓又謂文中帶說開礦利小而害大非數十年所能收效似閣下曾經用機器開礦熟知其利害者若尙不知請撥冗赴西洋各大國游歷一徧當悟鄙言之有據蓋雜采諸國諸書而爲之非杜撰也文中五金所包者廣非指金銀一事也洋藥不能禁其來開鴉粟之禁以相抵制此所已知者也又謂

爲粟產多稼穡收減此老生常談世人官話究之雲貴川陝無處不種爲
粟何以民食未缺吾欲弛禁蓋深惡沽名之輩不提禁洋煙而專言禁爲
粟其實並未能禁剛吐柔茹貽譏中外掩耳盜鈴愚弄 朝廷而執事復
隨聲附和若爲侃侃正論也者又謂不能禁洋藥之來不能禁華民喫食
沾沾於禁爲粟弛爲粟論雖異而同爲一偏誠是矣執事自度才力與時
人才力能禁其不來乎能禁人喫食乎林則徐黃爵滋當 國家全盛尙
未辦到諒亦不敢稱雄然則爲救時立議似仍弛爲粟之禁亦不必明示
以弛不深追究可也招人誹議是專就人一面看當論是非不論毀譽也
試帖小楷絲毫無與於時務此所已知者也又謂文策疏論出入經史可
覘經濟惜未於稍加變通下暢言之誠然誠然近人條陳變通考試亦多
術矣皆被部駁吾姑發其端以待當路之猛省而自擇其執迷不悟吾則
旣言之無可駁也至稱制科代有偉人曾文正與兄等皆科目得之此論

前數年早經開過尙記憶否且卽得文正與兄等數十輩洋務亦斷辦不好此微明自照不敢強飾正誤於當日之時文小楷也又謂算學比於天文生爲六藝之一聖人未嘗不講究兄卻未見聖人留下幾件好算數器藝來又謂格致測算無非欲其用諸製造然天地萬物萬事皆有製造之法之意何可藐視又謂統名之洋學局疑於用夷變夏名不正則言不順是必華學卽可制夷卽可敵夷若尙不足以制敵則取彼之長益我之短擇善而從又何嫌乎姑不必以趙武靈王胡服爲比卽須綜覈名實洋學實有踰於華學者何妨開此一塗且夷人已入內地駐京師公尙斷斷于夷夏之防則必真有攘夷之本領然後不爲用夷之下策請問公有何術乎僅僅清理數十萬交代遂爾目空四海自命籌餉生財確有把握吾斯之未能信又謂於枝葉上刻畫未於根本上推勘而仍以用人理財經武爲根本則鄙人正摺條議內已反覆言之何以不將吾疏通體研究精明

再爲發難至圓輒寬弛一派徧布方面此誠今日之失而非疆吏所可力爭卽言之能遽改乎又謂陸兵數十萬皆持後門槍沿海數千里徧布鐵甲船而以圓輒寬弛之人督之將不遇敵而敗可決果能如此亦未見其必敗今既不易其人又不講其器遂必勝乎同一敗而有器究與無器稍異幸勿輕量天下士也又謂端謹者多苟且不任事其敢任事者往往喜用偏鋒卒亦不能行其說然則將用何等人爲宜如公之端謹恐亦蹈不任事之過若欲任事不應妄以任事爲偏鋒也又謂招延有學識之士參識軍國勿輕聽輕淺小才之新論如執事可稱有學識矣乃於軍國重事強不知以爲知其他又何賴而何望也又謂言之而行則誤國不行則損望竊以此言若行可延宗社數百年不行則後有王者必來取法無所誤亦無所損危言過慮非所敢承以閣下託於諍臣諍友之義聊布腹心以當面談原函及復信可鈔致品蓮一閱

正月十日復郭意城中書

弟膠膺重寄無補清時畿境枯窘異常措施靡術徒兢兢焉顛蹶是虞而朝廷以拱衛相期中外以綏懷相屬張弛緩急之際空拳隻手益費支持可勝悚疚筠兄於臘月十九日抵保適弟已先期赴京叩謁梓宮遂卽北上二十七日遇於長新店暢談半日稍慰闕懷昨將竹報專足送都頃得覆書正月初九日蒙兩宮太后召見垂詢履歷及京外服官年分甚詳眷遇優隆而恭邸亦有洋務精透之語局外窺測似先用京堂洊躋總署一席以筠翁之學識必可勝任愉快尊慮質直太過或京官較外官尤宜耶詰嗣子滌器識才品似玉堂中人而非風塵俗吏浙省同班過多更慮一時無可展布耳

正月十四日復丁雨生中丞

惠示議覆總署六條大稿披讀再四逐條皆有切實辦法大意似與拙作

一鼻孔出氣而籌餉條內推及陸路電報公司銀行新疆鐵路用人條內推及農商受害須停止實職捐輸此皆鴻章意中所欲言而未敢盡情吐露者今得淋漓大筆發揮盡致其比喻處痛快處絕似坡公來書所謂現出全體怪象雖令俗士咋舌稍知洋務者能毋擊節嘆賞耶鄙論漸棄新疆弛禁營聚擴充洋學各節頗爲腐儒所疑詫實皆萬不得已之謀尊議略爲發明而不爲過激之談足見執事洋學果進揣摩時趨亦大有進境直將優入聖域豈徒四科十哲已哉方 廷旨飭議時春帆勸卽鈔寄尊處代擬因期限過促展轉誤時又恐近年沈酣古籍不復自出新義乃冬間兩次來示並未提及詭秘殊甚拙疏到後復傾筐倒篋而出之若非鼎湖之變此事早經議結亦無從代上矣去臘十八日赴京叩謁 梓宮晤 樞廷文李二公皆詢執事何時北上總署以各省覆議到齊惟幼丹與鄙人兩議切實餘多對空策今春俟吳子健中丞補進後當交 廷臣

會覈定議擬開篆後據情鈔摺入告或無遲誤蔣蘇泉冬月抵京旋即病故曾沅翁臘初入都適 國喪未能 召對筠僊正初抵京已 召見一次恭邸贊其洋務精透似將內用 兩宮垂簾 朝政清明遣戍七太監擬黜貴寶文錫兩大臣尤見剛果執事久經宣召曾服勤於 先朝際此時艱亟應投袂而起毋再濡滯觀望致滋疑議至於用行舍藏其權仍操之自我如到京後所如不合或用違其才尚可從容辭退也幼丹洋務船政比之時人似勝一籌其鯁亮公忠不避艱險尤爲罕倫中外聲望日起臺灣已議准閩撫移駐想當別有位置其覆議稿及日意格張斯桂條陳鈔呈台鑒餘子碌碌更不足數彼南久未來津去冬作古省三仍在肥鄉召民回粵未知何時赴任竹堂亦非使才荔秋爲古巴華工一事赴都辨論何子莪有謂其能使絕域者未審志趣才器何如彼宋春間能否北來此投時利器也

正月十五日復王補帆中丞

各省籌議海防覆疏聞祇吳子健展限未到前聞 廷臣於多月杪會議
嗣因 先皇疾革遂爾遷延約今春再行議覆執事復上開源節流之議
餘勇可賈所稱西北水利先於黃河漫決淤廢之地試辦古人言之屢矣
間有試行卒無成效蓋天時地利人力與東南迥異又溝洫稻田工本甚
鉅官民無從籌墊弟自九年駐津後即欲沿沿海灘城地多方勸諭一無
應者近始令防營弁勇操練之暇兼治營田籌給牛具農本每頃已費千
金足見初始之難黃河淤地衝漫無常更難集事開礦則理大物博果以
西法行之爲利甚溥惟官本商股先須重費而徐圖後效亦虛信從者寡
兩生謂須從公司銀行生根深得洋人三昧惜中土無人提倡之耳此時
論開源祇有從天地自然之利設法推求誠爲至當不易節流以裁兵額
爲長計各處覆疏亦多言之似不能不辦自軍興後各省情形不一有兵

馬未盡復額者有發餉五六七成者與 國家全盛時迥異將來勾稽停減內而戶兵二部外而文武各衙門均須得人認真釐剔或可勻出實餉若干遽指挹注海防之需萬難湊手然閣下注意及此可謂能見其大巡撫移駐臺灣一節聞吏部主稿核准惟刑名錢穀升遷降調例應撫署主政者海外如何統轄總督兩司相距過遠如何會商請示不至貽誤似須再由外間妥議定案幼翁年前已否內渡開春當仍同臺執事往替之期尙早也弟近在畿輔聞 鼎湖之變不得不籲准赴祭臘月二十二三日迭蒙 兩宮太后召對哀愴迫切之中有惕厲維新之象紀綱整肅七噏不驚誠屬不幸中之幸和翁准假能否復出俾如前案如何查覆未見明文召民尙未來津兩生遲遲其行值此時艱義難滯滯昨已專函促之復洪文卿殿撰

樂山觀察奪情一節所見極爲正大前在津時見輿情愛戴之深曾面商

樂山俟回籍葬親事畢再出襄助渠再四堅辭籲准終制是以津郡衆紳赴轅稟留當經批駁不意李侍御又有此奏比以業奉 旨准躊躇莫決出京後卽接據樂山來稟請據情代奏扶柩回籍守制正與卓見相符周游諸公聚訟紛紛固係正論不知實非樂山所願也現已繕疏於開篆日入告聲明俟歸葬事竣如有緊要需人之處再酌核 奏調似覺面面俱圓辱蒙陳義之高期勗之厚附以奉聞

正月二十日復丁稚璜宮保

濮范壽陽各屬境在金隄以內今南岸置隄偪溜使北以後涸復恐不能速籲懇仍築繕隄濮范旣築則開境必須接築尊意因開東民力不及敝處無款可籌慨然照東境津貼全數協撥共銀十九萬數千兩已飭恩道等照辦公忠厚誼銘感逾涯至南北岸防守之處擬留河南廂兵二百餘名並工餘料物分儲開濮險要以備伏秋搶護責令地方官民助力俟本

年防護平穩再奏設廳汛脩守以專責成誠爲經久要計前據恩道稟稱
尊示暨緩北隄弟已函囑進止事宜悉候大才酌定查徐守本衡在永定
河辦工多年工程機勢均尙熟悉辦事亦能核實曾飭赴開東會同大名
道府督籌妥辦既經台端允撥巨款諒能勉承德意力爲其難該道府等
不日勘估地基工段稍有定局當再奉報也此事雖未必有十分把握誠
如尊示若不趁勢一氣趕辦以後恐難爲力大勇血誠豈勝欽仰弟於本
省應辦之工未能爲執事少分心力而轉累閣下兼籌始終徒自愧疚惟
須一手經理目前督責成功日後報銷工款不致兩櫛幸諸事就近主持
勿存客氣爲禱至東省海防向來未甚措意擬擇要建築礮臺於萊州後
路創設機器局洵爲急務大沽南北岸礮臺多因僧邸舊基加築未盡合
式惟周鎮盛傳所築新城礮臺工費較巨較可制敵容埃到津後飭繪圖
式並將覓到布國礮臺小樣乘便寄呈前閱冀藹人擬具海防芻論八條

語多可采似於洋學新製尙有探討尊處諒亦見過或謂礮臺宜設於地險水曲敵船必宛轉之字駛行之處方能使敵船多受數礮又可前後面通打此形勢方向最要也臺式必須橢圓宜斜側而不宜平正使礮子斜拂而過不至正面受敵放礮地步要寬則可轉移趨避敵彈此式樣大略也製造礮彈修理槍礮所需機器工費無多仿造洋火藥建廠置器非數十萬金不備萊青郡縣山礦多煤鐵若購洋器雇匠自開大可接濟棧局輪船要需外人必不敢覬覦否則事事須購自外洋諸多掣肘儻蒙留意經營豈獨東省海防之賴耶

二月十日復鮑花潭中丞

年內在京五日略聞新政規模甚爲整肅 深宮端拱 樞廷照舊贊襄遇事多下部議閣下久參部務深悉底蘊堂司主稿者豈皆明澈條理操天下政權仍在書吏非外臣所能力爭也各省財力分耗太多西陲恢復

無期已成無底之壑總署力請整頓海防鄙議必不得已緩西師以顧海疆餉乃有著 朝議 祖宗已得之地不可棄而弗圖二者兼營則皆無成而已但冀因循敷衍十數年以待 嗣皇親政未知能否支持不生他變焦悚莫名

三月六日復潘琴軒方伯

接上元日手書知英使由緬境帶兵將三百餘名入我內地沿途散勇皆欲藉端蠢動是以十七日有馬緡譯被戕之事果不出尊意所料也查威使照會總署並未預言兵隊何事深入內地未知其派兵時曾先商明彥帥與否如未經商准不獨有違條約亦顯恃萬國公法滇中新復之地民情浮動固屬無從保護在我尙爲有詞將來威使派員到滇時應查明公法書內第四卷所云調兵不能行於局外之地各國和好時固可有權索路惟不得強爲通行局外者或准或禁皆可任意等語中華自主之國豈

容他國無故調兵入境如未商准則軍民勢難甘服持此公例先與詰難再轉到查兇議抵議賠或冀漸有歸宿威使赴滬與印度英官商派往查觀審似亦自知理絀不至遽動干戈執事務商之彥帥妥爲調處昨已節錄來函飛致總署以彥帥在滇年久呼應尙靈請其責成相機辦結勿爲遙制宋丞與英員到滇計須五六月間籌辦情形望隨時據實詳細馳報京銅百萬觔改由海運至津起駁招商輪船秋間諒可陸續赴香港承運容卽臧諭唐丞廷樞等豫爲籌商惟運腳及上棧起剝一切經費章程必須詳妥定議事關公款應請滇帥備文咨商飭遵乃有把握

三月二十六日復馮卓儒觀察

英繙譯馬嘉理被戕一案新聞紙雖有歸咎緬甸之說威使照會總署據印度藍貢電信所述則謂騰越帶兵大員與土司所爲連日赫德梅輝立過津謁晤曾之鑒鑒而雲南岑中丞二月中旬函稱以野人搶去英人軍

火數狀似不知馬縉譯被害者殊爲疑竇迭奉 寄諭飭查尙未具復威
使派員前往查辦或不致遽開兵端至申報鐵甲船北上之謠更屬無稽
嗣後探報若何情形望隨時詳細飛示昨與梅輝立辨論以奧順輪船誤
傷委員二十二人之命議抵馬縉譯一人該會謂情事絕不相類英例海
霧碰船向祇議之天數且閱麥領事及兵官會審判語是奧順無錯鴻章
力舉錯聽氣管日記未寫各節與之駁辨或請其按察司威公使等再加
審結據云英例一經會審官評定卽上控他控無可更改語甚固執目前
若再會訛仍以查問奧順有錯無錯爲要錯則議賠至人命雖重卻包在
船內斷無抵償之法望相機爲之可耳兩生前商令唐丞出洋訂辦船噸
尙無成議葉願之公正精幹卸篆後屬其來津一晤松亭人亦勦能似可
相助爲治王承榮事無庸咨明總署也

四月三日復陳荔秋比部

區海峯志氣堅卓年力正富薦舉得人曷任欣佩惟出洋之行須與四批幼童偕往計期當在夏秋之交而執事銷差早遲尙難預定調用京員必應奏明辦理海峯既決意遠游擬據來函所陳各節附片 奏調屆時再會同南洋大臣剴飭遵行高明以爲何如另擬駐洋局章程四條均甚周妥容卽分札上海哈富兩局照辦頃據日國新派公使法姓過津函稱卽日赴京議辦華工一時似難就緒

四月十五日復沈幼丹節帥

倭侯移剿獅頭社聞已接仗未得確報恬系莫名巡撫駐臺之說何時定案補帆謂須仿照直督駐津之例往來兼顧仍欲攀留大旆主持善後事宜竊恐事權未能盡一駿足未可久羈卓裁以爲何如赫總稅司前來津議購守口礮船當與商訂議單鈔呈鑒核總署業經 奏准行知矣阿摩士莊係英國造礮名將鐵甲船多用之大約至十八噸而止茲先購二十

六噸半之礮子重五百三十六磅三十八噸之礮子重八百磅據稱可穿破鐵甲十餘寸如果船式配造合宜必可得力明歲上半年到津試演再行奉陳尊處派日意格出洋順過該廠乞飭密探價值情形詳示爲感擬派水手前往學習造駛一節本欲請由閩滬各船挑選但相隔過遠時日參差恐於已定經費外另增用款且與稅司廠商不能呼應一氣故屬赫德由南洋凌風等船內自行酌派到華後亦可由我調度也日意格謂師船所用槍礮宜各省一律極是正辦滬船添購洋礮專采布商克虜卜一家敝處礮臺陸營大小礮亦多用克虜卜槍則暫購英國士乃得美國林明敦兩種已覺子彈籌造不及若參用多家誠恐誤事閩船用礮雖多精品究嫌紛雜祈擇尤佳者酌定爲幸日意格寄到鐵甲船二圖弟與駐津外國師船逐細考證據稱新式爲佳妙有轉旋礮塔最爲得用各國近多此式惟原圖未開明用煤多少隔艙鐵板厚薄喫水必深其價必昂目前

餉源支絀恐難問津各省海防條奏 廷臣雖已議覆大致間有參差因無巨款勢又中止聞交總署覆核未知如何敷衍結局也筠仙同年陳臬珂鄉欲赴臺一謁船政臺務若得此替人必可勝任子壽纂脩畿志襟袍非凡近頗究心洋務堪膺出使絕域之選惜無九萬里風載之以行耳滇中戕害英繙譯一案口舌正煩古巴招工亦未定議邊患日棘措拄無方可勝焦悚

四月十九日致曾劄剛襲侯

前沅丈緘商三事已據實奉陳知入聽覽旋家筱兄函告業將刊刻經史百家費用五千金續爲墊解未識何時督收至執事通達時務於洋學別有會心若請主持機器局務用其所長洵屬兩有神益惟滬局自卓儒簡放關道兩帥卽 奏派李勉林入局與鄭玉軒會辦時吳中丞方緘請以黃恩韶接辦意見已稍參差兄自師門作古雅不欲與謀滬事況以吾

弟才望地位恐未便隨人俯仰躊躇再四難遽定斷昨沅丈筠翁過津商榷如台駕可暫離家或於秋間枉過面議襄助位置之法頃適接舍季弟來書謂尊意擬在湘用機器開煤礦已馳函懇懇屬將定購磁州開鐵煤機器奉讓蓋不知此器並未購妥也湘煤極旺距水較近機器尤興利之大者但事體重大非倉卒所可定局公若有意於此乞更悉心探討徐商辦法鄙狀牘平惟公冗至集精力日疲深虞隕越

復馮竹僊觀察

英刑司十六日審訊奧順一案據稱二十日內外即可斷結是不待麥領事回滬已有端倪達文波謂兩船皆有錯誤則賠數應減卽奧順全錯亦應分成議賠如刑司意仍偏袒麥曾同後執事應切催會審至再至三著細與之理論不可放鬆唐丞等刊布水師公堂供詞極爲精核刑司訊斷各語囑令續刊備案該丞擬刑司偏斷將赴英國控告無論有益與否藉

以脅制彼族其氣餒或可少減亦與照約會審並行不悖也此中外交涉第一重大之案務逼令認錯認賠而後已至金眉生造言好事可置勿論敝處亦置不覆馬嘉理案歸罪緬甸似係藉詞吞併李梅所云似非無因此間施領事亦謂赴滇觀審威使意甚游移該使何日回滬望傳諭宋丞從容靜待一聽客之所爲如格維訥說明不往宋卽回津可也安持生采購機器前函已詳及之堅守原議合同極是朱翼甫思力沈摯已否啓程雲甫前已面陳伊弟往查緩辦各情磁州開礦雖難剋期舉辦而機器精奧煤鐵礦法必須預爲探討明確以便擇地試行總署商囑敝處派員赴英及各國查詢礮價船價揀選未得其人翼甫自東洋回亦可商辦昨檄調王筱雲來津欲留辦製造局已起程否召民若赴金陵月底能履任否四月二十日致彭雪琴宮保

沅丈筠老先後得缺過津暢譚一切厚帥踉蹌入 觀行李蕭條然幸

兩宮眷念舊勳委以巡閱長江令吳楚歲籌公費稍資祿養厚公亦喜與
麾下廿載同袍一朝共轍相助爲理尤相得益彰此瘡痍赤子患難友生
所同聲欽慰者我兄聞之當更拊掌軒渠以後互替往來公私可兼盡矣
弟留厚公在此盤桓數日渠卽由運河南下先詣金陵一商望公於江干
同棹相待鄙狀鹿鹿邂逅諸君既漸蒼老顧念衰鬢亦漸彫頽不覺感慨
係之

四月二十九日復沈幼丹制軍

奉二十六日 寄諭知執事晉擢兩江籌防六省道大投艱非過人才力
老成德望不足以副之 命下之日 朝野慶忭豈惟梓桑蒙庇舟楫同
心鄙人諸務得有諮商不至孤立無助翼幸或免隕越鼓舞歡躍尤倍羣
情 廷旨催速赴任又兼臺事牽掣巡撫移駐之說能剋期往替否聞閩
中覆奏請督撫輪駐若再交部議固多濡滯卽使照行亦恐意見難齊功

效莫必然我公固得大解脫矣另 派大員接辦舍疆吏更不妥治至船政一事或擇司道照料遙爲控制尙無不可想卓裁自有權宜補帆前函以俊侯所部十三營特爲長城萬不可離弟因台旃行止未定未及具復茲獅頭社番案未竣唐軍本無內調之理惟該軍將士久奉麾下爲依歸又苦病疫常思西歸聞帥節高遷難保不生覬覦務乞體察情勢如必須久留妥爲撫諭以安軍心曷任企頌江左留防陸軍方形繁冗原不須唐軍也弟以輟庸謬附驥尾北洋地界雖狹而事關重要身處瘠區尤屬萬分棘手總署原單所稱先創水師一軍津口現祇陸倫華鎮海一船昨已調赴奉天東溝協剿兵輪尙無何況鐵甲究竟一軍應設兵輪若干隻何人堪爲統領敬求酌示所有一切機宜幸隨時教督其不逮丹國電線聞已購定如華人演熟將來仍可推行他處臺地開煤已否定購機器磁州雖曾議辦惟距衛河太遠轉運費力似不若試辦於東南近水各處船政

額款奚不指撥閩關四成以免掣肘滇邊命案威使派員往查尙在游移
岑帥謂山險可制英兵壯哉

五月一日復英西林宮保

粵餉本非有餘沙田捐聞亦不易籌辦 旨派幼丹制軍督辦南洋海防
而以鄙人膠領北洋事體煩重實非棉薄所能勝總署與農部允爲籌撥
然度各省財力一時難湊巨款出洋及兵船鐵甲人才尤不敢輕相許可
俟幼帥抵任當再從長商計或謂粵東地當尾閭民氣勁悍非彼族所覲
覲設防購船尙可從緩惟其人多可用往來南洋各島在洋船洋局從事
者性習相近或有忠義雄傑之材可備驅策務乞隨時留意采訪見示爲
幸畿疆雨澤未甚均霑麥收尙稔知念附告

五月八日致沈幼丹制軍

台事能否交替獅頭社剿撫若何奉 恩旨後如何覆陳均深系念昨接

總署四月二十九日公函以海防兵餉要件意在共爲其難而條目辦法若何不敢遽爲臆斷屬弟與尊處會商切籌開辦並以敝處正月間代奏丁雨生中丞條陳語多可采屬鈔寄執事等語原函想併致台端不另鈔送茲將雨生原奏照鈔奉覽雨生到京後病體未愈聞將請假南旋總署覆奏時本擬請簡雨生爲幫辦大臣旋改爲由外請簡固爲意見相合於事有益亦因王孝鳳少卿單銜覆陳指摘多端恐局外或生異議耳弟與雨生共事最久洋務吏治精能罕匹足以幹濟時艱惟辦事過於認真應物每多疏略動招忌怨樞廷亦審知其才未能設法挽留又欲推至鄙處北洋財力既窘局面甚小竊慮無地可容雨生不日過津當再商辦執事將來赴任是否先請陛見或得面商大略

五月二十六日復潘琴軒方伯

馬嘉理一案正兇日久未緝總署賴得岑帥四月二十日奏報甚爲焦急

是以五月十六日有奉 旨派家兄前往查辦之事敝處迭接彥帥函摺似以議防議剿爲急而於此案兇首何人主使何人仍屬游移尙恍無怪中朝怫然變計也英兵雖已至藍貢海口其注意先在緬甸觀衅而動必不輕舉妄發微聞彼族私論以緬滇交界山險路歧非用兵之地野人士司性習難馴諒必不遽深入不過以兵勢脅緬王陰與之合以制中國耳馬嘉理案主謀之人英使固早確知前曾照鈔新聞紙寄岑帥處吾弟想亦寓目訪聞所說無甚虛飾若稍曲護必不甘休終恐激成大變彼所欲得之罪人李協臺者似應由執事等設謀誘致省垣儻令逃脫轉覺情虛將來人證傳齊是虛是實當有水落石出之時我亦可以謝英人若必令置身事外英必不服案必不結滇之後患亦天下之後患也務乞相機密速圖之庶家兄到後本案易於辦結再議應否通商則非在滇所能定案矣英使出京已及三月徘徊滬上詭變多端莫測其意指之所在宋丞

寶華駐滬靜候兩月有餘該參贊格維訥等尙無起程赴滇日期似暫避炎夏難峽之險六七月間或可動身日來未接家信不知彼兄如何布置何時啓節 廷寄屢催似不得過遲將來諸事仰仗大力照料維持幸勿瞻徇顧忌事理所在自有撥雲見天之日也蓋帥已報啓行當已抵任與彥帥意見能否融洽楊鎮陳道等如何查辦情形仍希隨時詳細密示俾擴見聞鈔示各稟牘極有條理遇事著實細心諮訪講求自有長進苦命祇有苦磨於苦中討生活耳兄奉督辦海防之 命無錢無人從何著手兩生卽來幫辦可得一助會館捐項容與彼兄商之

復沈幼丹制軍

奉四月二十三日手示鈔件敬諭威棧所攝頌社蕩平從此內山野番設法招撫當漸回面向化惟唐軍將士獨冒炎瘴病殤過多臺地水土旣非所宜後山毒蒸尤損精銳念之惻然聞俊侯派韋鎮如柏來津稟商尙未

見到若知大猷東移恐有攀轅臥轍以從者未知台端與補帥如何籌議
滬上探稟謂補翁於五月十一日啓程諒可接辦臺務獨任其難執事何
時內渡回工後再籌接替船政之人略爲料簡計卽展輪北駛謝摺 批
回是否入 覲後再行赴任海防事宜及江左兵餉大局有牋牘所不能
盡陳者亟欲覲面暢談果有此機緣否餉源之絀各省同病由於協撥太
多無從裁減吳中著名財賦亦患竭蹶兩亭上年添募及築臺之費百數
十萬僅賴暫留洋稅四成鄰省協濟尙多不敷覲莊未必更張或待履新
後設法彌縫耳船餉必須有著他人乃敢接手回省自可商定筠仙以閩
臬無可展布欲勾留數月便卽引退 內意如何用法尙未得知晤時必
有以鼓舞之但渠與左公積憾未平似不肯任船局亦實有未便也滇案
聞由邊將主使岑彥卿覆陳未得主名竟欲鋪張戰守昨奉 旨派家兄
馳往查辦事多棘手殊代焦懸總署來函鈔呈可知其詳新疆謀食不暇

季老力排景袁似終歸領兵守險之局

六月二十一日復劉峴帥

淮軍額撥各款重蒙函飭催解感佩奚如敵軍月餉以涇蘇釐稅及蘇藩月協二萬爲大宗前因蘇釐藩庫緩解兩月曾懇子健中丞商催頃接復函亦蒙允諾弟與江左誼屬一家緩急甘苦相爲體卹由來已久非至窘迫時斷不敢妄有呼籲也幼帥函稱須俟唐軍盡數內度乃可離臺至省接當與制軍商定船政替人乃可料理北上計轉折尙多一時似難成行執事現處境地雖非何張諸公以蘇撫調署可比倚眷正隆一切布置規模允孚衆望海防專餉雖奉撥定釐關各款勻解恐難如數事體繁重開辦爲難尙希教示

七月六日致劉峴帥

連日梅輝立威公瑀過津辨論滇案威使因接總署照復據滇撫查稱收

害馬加理等係邊外野人所爲疑 中朝有意欺飾雖已 派星使查辦
亦恐不實不盡其詞意甚爲忿激卽日進京與總署商辦除滇案外更牽
涉許多事情據稱約於一月內如諸事不能定議卽行出都絕交滇案由
印度大臣辦理各口通商由水師提督辦理等情雖係恫喝常態而彼所
要脅皆我所萬不能行之事難保不終有決裂弟已飛致總署善爲駕馭
並請家兄於到滇後查訪確情秉公核辦未知能挽回萬一否惟南北洋
地界過廣必應思患預防前示既恐呼應不靈幼帥固辭不獲自應迅速
赴任及早籌維業將尊旨密達總署請 奏催幼丹剋日履新唐俊侯一
軍頭隊已回滬上前因江防無事其徐州原營聞尙留人看守是以商令
回徐並恐展轉誤時已分別咨行知照頃接徐道文達稟請該軍暫屯揚
州五臺山三汊河一帶已稟尊處核示該處地勢寬展距江較近調遣更
靈想尊意亦以爲然卽祈就近飛速分飭遵辦爲幸唐軍在臺勞苦日久

疫病極多分起西歸難盡整飭上海斷不宜久駐可否卽令官輪船陸續運送瓜洲起岸俾及時休養整頓以備緩急幼帥卽奉 敕催似須八月內渡九十月乃可抵江其未到以先一切仰賴大力主持籌畫感佩曷任七月十八日復英官保

迭奉 諭旨及總署戶部來咨知尊處籌備海防頗多牽掣各省財源均形竭蹶粵東雖著名富庶而紳民浮議易騰地方物力亦絀想作事謀始當幾費躊躇也不才忝領北洋綢繆門戶責任尤巨無如奉撥額款各關四成除扣協餉借款外所餘無幾釐金指撥太繁亦恐解不如數況又南北分解盃水車薪於事何濟是以奉 命兩月尙無開辦之時焦灼奚似粵省釐金三十萬本年批解一半諒可勉籌數乞飭局如數依期解交爲感幼帥履任計在秋冬之交一切尙無頭緒渠力似未能兼顧粵洋仍賴大才勿忘勿助遂漸圖維曷任跂幸古巴秘魯華工冤苦萬狀查係粵人

居多務請督飭官紳設法嚴禁拐騙出洋功德無量頃聞汕頭有荷蘭秘魯船隻招雇之事尙乞飭該鎮道密速查禁弟亦鈔摺行知矣

七月十九日復沈幼丹制軍

辭兩江疏深摯乃爾 溫旨慰留物望允翕昨因峴帥函屬代催赴任適英國威使爲滇案來津要求頗有決裂之意念南洋控扼機宜最關緊要密請總署轉請 敕催不必迂道展 覲致誤事機未知當軸果見聽否峴翁謂其呼應不靈本係實情且海防籌辦伊始雖餉項不能應手亦須及早就近察商不獨江左士民望公如歲也唐軍久困於疫近張王李田四將相繼殂謝精銳殆盡殊爲慘傷賴神謀獨斷慨允西歸孰不感泣用命聞頭二批已至滬上弟屬杏蓀卓儒等急雇商輪接運瓜洲並商峴翁卽令就揚州五臺山三汊河一帶暫紮休養整頓俟日內當亦續至矣此軍行後大嶽定已內渡船政既請撥閩關四成餉可有著惟替人正復

不易尊論工程熟者資淺位望重者生疏洵爲切當商定何員恐須執事
遙領綱維耳海上水師一軍承示須兵輪十數隻現尙無錢無人無船從
何措手部撥四百萬有名無實各關四成除去協餉借款所存無幾各省
釐金指撥要款久已入不敷出斷難如數解濟非湊積二三百萬不敢輕
言購船置械少遲擬先由弟備文提催集有整款再商請指示如何擇要
舉辦統領輪船之難誠如公言蔡瑞庵曾隸敝部尙屬沈毅耐勞兵船操
法似是初學鎮海陸倫華材藝可取精力亦强大可造就操江甫由滬調
來津口不孤以云禦侮再添一二船亦無濟也兩生中丞辦秘魯換約後
舊病增劇幾不可支頃已奏請 賞假回籍調理約明春北來渠深感相
知之雅容當另有獻替威使派梅輝立赴總署商詢數事謂如不得請定
行絕交漢案其誦在我而中外泄沓至今不爲據實申理無怪其大肆咆
哮未知能設法調停否家兄於洋務素少涉歷昨始由鄂啓行英使不肯

赴鎮有被告無原告則亦難得妥結磁州去水太遠鐵路未敢創造須俟履新後於瀕江近水處逐漸籌辦耳子壽近頗留心洋學亦有志於出使鄙見東洋最宜但總署屢言遣派而不果行

七月二十一日復郭筠軒廉訪

所論臺地開闢機宜謂添立郡縣須審量村社分析民番其野番屯聚處約法羈縻戒勿嗜殺土地人民尙不足與經營洵爲能見其大若侈言遠略所在屯兵歲餉百萬以外又等新疆之有出無入爲國家增一漏卮其勢亦斷不可以持久補帥依違其間能否熟籌定計幼帥諒已回省面相辨論冀有歸宿所得番地果無可開之利似不必張皇幽眇致有後艱言者多以經略臺灣可爲富強本屬無根之談但得重臣坐鎮疏通拊循求相安無事而已船政替人幼帥擬與和公商定本在南洋轄境無論何人承辦尙須幼帥遙制爲宜請留閩關四成已分海防額餉此後仍要有

著之款乃可擴充南北洋分任海防亦係有名無實歲撥四百萬斷不能如數撥解即使全解一時尙不足開辦也省厦電線既以十五萬元自購何以仍授權於丹人想由華人不能承造雇用洋師若令精巧員匠幫同學習俟藝成可逕遣去流弊較少聞閩中新設水雷局似與電線相因而成其教水雷洋弁技藝如何尙欲喚至津門一試水雷爲守口破船利器名目甚繁亟須考究精練東西各國日益強盛中土一無足恃卽脩礮臺添防兵絕非可云抵禦尊論欲求制勝 朝廷之計似更茫如捕風我輩祇有盡所能爲其所不能爲者天數人事之窮無如何也威使爲演案日久遷延岑公復譔爲野人生事來津要求令梅副使赴總署商詢如不得請勢將決裂日來未接都中復信未知設法轉圜否家兄於十八日啓行此案其絀在我彥卿一味蠻橫恐無妥結之法兩生因病乞假回籍約於明歲北來用之既不能盡其才亦遂不爲世用伏日苦熱北省數十年所

未有南中當更甚尊體近復奚似當事諸公繫維必切半年告歸之說必不可遂惟未識 內意究何以處之

七月二十五日復丁稚璜宮保

垂詢海防一事公忠懇懇之懷昭然若揭鴻章竊測之愚於此事毫無把握祇益悚慙張道在津炎歆方盛業經徧查機器局章程摺歸烟臺想已稟商尊處核辦茲將應復各事條列於後

一東省洋面散漫誠如來示防不勝防將來集有巨款須照總署原議創立水師一軍約鐵甲及大小兵輪船十數隻駐扼廟島旅順口之間以顧北洋門戶但目前力量尙做不到應如尊議先願本省口隘於煙臺登州威海擇地次第築臺尤以煙臺爲最先最要其口內形勢亦復散漫似宜扼要建築數處相爲犄角臨事或可嬰守防海新論謂南北花旗交戰時鐵甲兵船進口直衝過十數礮臺而深入則臺雖堅礮雖多亦未必能禦

大敵惟得地爲之稍壯聲勢耳礮臺做法不獨中土各省式樣互異卽西洋各國亦各有不同大都以沙土堅築臺基外面及頂上厚築三合土可期經久尊意外皮加數寸鐵板裹之則與吳淞江新築之臺相似需費較多張道面稱擬雇洋匠董其役聞沈幼帥建臺灣安平礮臺雇洋師爲之糜費至十數萬尙未造成似須慎之於始或調募各處築臺員匠熟手而參考其宜爲穩著

一機器製造局距不能停泊洋船之海岸雖近無妨張道面呈委員查勘濰昌之交有白浪河形勢相宜費工尙省未知覆勘後可卽定議否無論製造藥丸與槍礮料物一一取資外洋實屬不便煤鐵能先自開采運用有警時不致停工其餘雜料仍多由滬定購均可預爲儲備徐令建寅本約中旬來津現尙未到俟到時飭卽赴東請示酌辦

一凡事非錢不辦統計三處建設礮臺無慮數十座築臺工本購礮經費

約共需百萬內外卽籌設一二處似亦需數十萬乃能齊備機器局款多可大款少可小然創建基屋略購機器總需二十萬金長年用款至少歲需數萬此皆要先事籌定若寬算窄用尙不止此數尊議兩事同時創舉擬籌三十餘萬竊慮後難爲繼就所指各款如海關常稅臨關稅課皆報部正款必干駁斥或將直省練兵等費移撥關稅而以釐金及鹽運餘利抵海防之用若進項無幾或先築礮臺徐議機局免致臨時竭蹶敬求卓裁至南北洋海防雖已指撥專款而稅釐所入各省關皆不敷所出斷不能如數照解前函已略言之卽使每年能撥百數十萬南北各分數十萬於事何裨鄙人忝守京畿鎖鑰空拳獨張一事無成常自愧疚總署又責令練水師不知何年何月始集得巨貲可以開辦執事擬設礮臺機局皆爲籌防本省之計於北洋大局無甚關係自未便分用此款致有望礙若指釐金鹽利兩項逐漸籌維不求速效積久當小有規模或先揮括大意

奏明立案可訂或竟不必專奏並希核奪主政總之時勢至艱物力至窘實不足辦此大事我輩身當其境祇有量力經營得寸則寸得尺則尺而已素蒙摯愛敢貢愚誠

八月一日致郭筠仙欽使

英使威妥瑪在津爲滇案饒舌多端先請簡派使臣赴英釋憾弭爭此本係當行之事昨奉寄諭知己特簡執事峻擢崇階適威使過晤述及台端久任粵疆聲望衆著令春曾相見於都城似覺大喜過望爲得人慶暮年作此遠游誠知非執事所樂爲是以總署先緘商敝處不敢妄有論列茲旨由中出名德宿望固已簡在帝心當此時事艱難排難解紛皆屬望於魯連之爲天下士也頃接總署致尊處及和帥函屬爲轉遞並請代催早日命駕北來務乞於奉旨後迅速交卸附輪舶至津面商一切計資遣瀛眷回湘及束裝北上非數千金莫辦希轉商和帥暫行提

借公款隨後籌還或卽作正開銷均無不可威使調集兵船多隻恫喝要挾所求各事勢難盡允且滇案正文尤無妥結之法卽我以爲妥彼仍必多方吹求惟賴明公到津後會商開導設法挽回俾無決裂大局之幸緣威使限於一月內定議計期或尙趕及岑公藐視外事初太唐突繼復遲延致成積衅 內意尙欲竭力保全家兄此行恐亦無益耳

八月四日復王補帆中丞

幼帥鈔示會疏極爲詳切此後臺省兼駐局面已定但兼顧卻甚爲難卽使制軍毫無私見氣脈已不聯貫況臺防餉需甚鉅人心畛域易分掣肘情形概可想見和翁近因電線一事與諸公頗有齟齬將來他事恐亦不免齟齬總署 樞垣雖明知其故而未能設法調停其將何以持久然數年來委曲調護之苦衷遠近固已周知他日公事若有貽誤積誠所不能感口舌所不能爭者似祇可據實瀝陳 內意視臺防極關重大當能曲

鑒隱微主持一切否則再相機乞退未爲晚也鄙意初疑筠仙可爲替人
昨因威妥瑪爲滇案狂吠奉 派出使英國卽日交卸北上則臺防善後
非公莫屬幸從容竭蹶圖之唐軍苦於疫病執事與幼帥慨允凱旋曷任
感佩豫軍五營果否允調抑另撥他營尙得力否開山撫番事難中止則
分屯進紮萬不可少至通商開墾之利茫如捕風筠公陳義甚高似有可
采處台旆回省約在何時甚念甚念滇案其絀在我當事遲至半年尙未
獲犯訊辦家兄迤邐前往一時難得就緒威使大肆要挾有欲絕交動兵
之語 旨令弟與兩生就近在津會商往復數次該使堅執不移 中朝
若不稍與通融恐將決裂時勢艱危若此豈可復開蚌端午夜焦籌殊增
悚惕兩生病狀仍未見愈知念附及

八月十三日復劉仲良中丞

閱初四日邸鈔知已晉擢專圻賢者彙征中外稱慶謝摺諒須請 觀若

免此役地方事宜可一手整理矣初六日奉七月十四日手書欣悉一
海防撥款現未解到分毫各省關情形略知每歲恐不能得半分解兩處
不過各數十萬於事奚裨鄙疏前請停減西征蓋通盤籌畫而出廷臣
模稜敷衍不云暫緩海防乃云從容籌備數十百年仍辦不成徒擁虛名
終受實禍焦悚奚如尊論龍肉之喻實獲我心就題論文祇能隨時添練
陸軍器械外侮日甚敵國日驕卽如滇邊一案威使來津吵鬧月餘所要
七條大半案外之事兄與總署商議有准有駁仍不見允昨已赴京向總
署饒舌謂半月內如不定議卽率北方英屬官商南下請伊國另行派員
辦理其意謂南北戰臺兵力皆不足以阻遏一經決裂如採取囊中物耳
能不令人氣憤至於滇案尙無頭緒彼必欲歸咎於岑彥卿楊玉科之主
使已查得憑證多端家兄此行將來何以交卷昨由兄奏准令薛觀察
就近馳往幫同辦理一切辦案是一事勸議邊界通商又是一事非得同

心數人協力維持如何下手威使七條內有各口內地釐卡太密請將洋貨在口完納正子稅後通行天下不准重征兄允照約整頓半稅單渠尙不謂然卽半稅單通行驗免無論華洋商人釐餉勢必大絀此層亦必辦到各省釐款必更入不敷出不但海防增撥無可指望卽淮軍額餉亦必大減練兵置器亦做不成矣時局如此恐雞鴨魚肉不可多食況龍肉之美邪江境舳舨二百餘隻殊無甚用似宜酌量漸漸裁併左公擬秋後派劉毅齋一軍出關銳意大舉甘餉似未可驟欠西省海防額撥如能籌解若干稍可濟急翹盼莫名幼丹本擬入 觀聞因滇事中變有 旨催令赴任無從而商然撥款先解北洋前已咨緘幼帥諒無畛域之見馮青雲來云萬年民情較醴湖濱有煤山可開采確否

八月二十三日復潘琴軒方伯

英國威使於七月初由滬來津與兄數次接晤因總署照會岑帥五月間

奏報謂馬嘉理被害係由野人見財起意云云大肆咆哮要挾多端派其副使赴總署商議欲先將岑帥參辦總署與兄密籌案未查明斷無先參大吏之理奉 旨令兄與兩生中丞與威使就近會商該使所求七條內有參辦岑撫及雲南邊界通商二條并奉及他事勢難允行僅允派員出使英國一件該使百般恫喝調集兵船十餘隻游奕煙臺大沽洋面兄毫不爲動迨八月初九日始怫然進京約半月內所議不成定卽帶北省英人一同出都絕交南下電報伊國及印度大臣分路興兵刻下正與總署爭論尙未知能否酌允若干以弭衅端然該使在津月餘鴻章實已脣焦筆秃仍無濟於事若滇中春夏間認真查辦將此案主謀下手之人奏請分別嚴懲何至于人口實使彼族饒舌京畿上煩 廟堂慮慮耶該使赴總署遞呈演案詳細情節確有憑證硬指彥帥暨楊玉科主使彥帥必不至此所可疑者雲階喜說大話或者先事知情茲仍令其查辦更無以問

執讒慝之口李珍國名字威使已自吐出必須到案實訊和協往提勿任
逸出緬境爲要家兄初五日龍陽來信似九月杪當可抵滇薛覲堂侍郎
續奉諭旨前往會辦諒亦先後齊集劉蓋翁臥病常德已否赴任目前
無論敵情有無決裂總因滇案而起必須就案辦案著實研鞫真情切不
可再有含混威使屢稱諸議不允決不令格維訥赴滇觀審卽都中議定
格維訥當由海道赴緬入滇是有被告無原告亦尙不能定讞焦系莫名
京銅頭批未聞抵滬年內似難至津承購寄銅條萬觔機器製造諒可合
用謝謝前屬借濟洋槍礮銅帽等件槍無佳品餘俟委員到時酌撥惟英
人若借端開衅明年海上必有風波津門首當其鋒防備視滇邊尤急祇
有相機勢緩急爲之大約邊界通商不能不允焉嘉理案有以激成之可
慨也夫練餉錢早經借給當商李朗民似無巨貲可辦銅本

八月二十九日復沈幼丹制軍

船政不得已而求助兩帥弟再三勸駕渠感知已推轂之雅亦覺誼不容辭惟近日復犯吐血眠食大減正擬假滿籲請回籍就醫 命下之日相對躊躇已自具疏迅速起程沿途醫調請督撫暫行兼顧並留吳薇隱觀察主持一切以待其來如奉 俞允執事可先料理赴任不必坐候交盤似亦兩得之計也兩帥血症由今正航海顛簸而起故以輪船爲畏途朝廷略知其隱亦未令附船前去茲令林守備候兩帥 批摺如何鈔咨賁往較爲迅速尊處先行知照辦理待驛遞到後部署當就緒矣兩帥初五六日定卽起程或可遇公於滬甯一帶面罄衷曲船務餉務均須晤商以後船政與南北洋一氣呼應似可請作兩處幫辦於全局更有裨益尙祈隨時酌裁至來示以兩帥爲叢鐫所集甘爲分謗足徵卓識毅力初不過王于兩京堂譏彈 樞廷皆不謂然此外並無違言也筠老何日登程七萬里之行似尙慷慨威使現在京饒舌聞可不遽決裂家兄九月杪至

滇甯爲認真查辦滇邊通商勢難堅拒賴薛觀察與之妥議知念附陳弟
因 陵差在邇擬初二日赴京隨扈事畢計須秋杪

十月二十三日復翁玉甫中丞

中土仿用洋法開採煤鐵實爲近今急務去冬各省籌議海防摺內曾屢
及之經王大臣議准試辦在案前家兄與執事咨照札令盛道宣懷會同
江漢關李道勘議在廣濟官山試開煤礦主持大計籌開利源曷任欣佩
頃盛道來津面稱該處煤苗旺而質堅民情亦無疑阻但若歸商辦久恐
爭利滋弊請官爲籌本督辦餘利可充防餉等情並據稱過滬謁商沈幼
帥亦甚慇懃因思開辦之始似須由執事會同南北洋大臣奏明立案僭
擬疏稿奉呈核定並鈔稿交杏蓀齋呈幼帥察商不盡之言仍屬該道由
甯赴鄂縷晰稟陳再請挈銜核辦至與國等處鐵礦順便紓及應俟廣濟
開采就緒後逐漸議辦鄂中助本家兄原有此說亦係陸續支取卓見何

如

復沈幼丹制軍

誦八月二十九日手書鈔件旋晤 樞廷知所請閩關七月後四成四十萬業奉 廷寄允行農部喜作深文之筆向來由部墊撥之款多令外省撥還而各省財力窘乏十不還一四成本額外存款既因船政動用應毋庸還在部中動舞空文星翁老吏乃亦沾沾計較且七月後四成早經撥定海防以海防移船政則可以海防之餉還部庫十五萬則不可執事行綜大藩嗣後遇此等部議勿過拘泥是爲至幸兩生南去方以船餉無著爲慮 旨令閩關先儘五萬籌解未知星翁果遵辦否昨俊侯杏蓀來津具述初八日大纛過滬直指石頭從此江皖士民皈依得所鄙人借助鄰光諸叨教益驩躍尤倍尋常筠老因威使以滇案未結無須速行小住津署月杪赴京似出洋在冰泮以後家兄日內抵滇岑中丞奏報獲兇犯十

餘名均係野人與彼族查訪證據迥異格維訥等多冬間續至諒必大費唇舌威使徘徊滬上迄未見來洋界裁釐及添設口岸諸議現飭各關局核覆總署徐與磋商雖不遽至決裂終須稍有變通以後各省釐源恐更支絀前商令海防額款暫解北洋目下將過十月限期各關四成分毫未解各省釐金除江西解到五萬由弟屢懇仲良而得者此外則亦分毫未解財絀時艱至於此極防務當從何下手耶再四籌思祇可就現有陸軍現有餉項逐漸整頓添備利器勤苦操練設有警變陸路或可自立爲背城借一之舉至水路無論大洋必須鐵甲大兵船非一蹴可幾卽欲堵扼內江內河其戰守之具亦費巨萬豈可咄嗟立辦江左雄於財賦久成虛名公試披尋積牘應亦皺眉加以督師一席近年屢署無復爲長久計者百務皆待整理望從容爲之勿操之過蹙也弟隨扈事竣旋津晤屈封河又將旅省廣濟開煤頃又緘商翁玉帥杏蓀回江當再面稟一切

十月二十四日復王補帆中丞

鈔示議覆海防大疏切中機要樸實縝密各疆吏中允推傑作惜未能悉見施行耳筠仙俊侯先後來津詢悉盡勸勝常比已旋省校閱武闈兼營並顧身勞而用心亦苦矣雨生抵閩常得晤聚興趣若何船政苦於餉不應手星翁果遄 旨先儘籌撥事尙可爲望左右贊助勿任藉詞逃脫此才絕非老於船局者能以疆寄就近兼管則笙磬同音曲終奏雅豈惟地方之福吳紳實無謠詠但與京朝官氣味太不投洽然亦知其爲救時良佐也臺防無事散碎營多似非所宜且餉需亦難持久該處既無大利可興生番亦無歸化之法或留一二整軍分紮鎮撫執事往來其間從容圖治而本省政務不至偏廢乃爲經久之計幸隨時察酌收束局面不必過泥前奏此事實在疆臣 朝廷固不遙制也機器開煤章程已否議定何時開辦有無把握乞詳晰見示張魯生聞隨幼帥入江另有委員會同洋

人經理否雨生諒可借箸代籌卽福厦電線亦不妨商請主持當有成效
弟自九月初晉京隨扈往返幸託順平滇案雖暫就緒了結非易

十一月十八日復曾沅浦宮保

今春東明境內所築南隄因距津保過遠力難兼顧商請稚帥就近主持
覈辦且稚翁奏請協款時本指東明隄工在內直省又無款可籌自未便
一頭兩樞各分畛域茲來教以東明隄四十里不如東隄高厚又有二十
里高寬更不及半又有十八里不及十分之三又有長垣境內二十里全
未脩隄現議添設廳汎有宜加高培厚有宜增脩聯爲一氣者祇需人力
不需物料屬移開州正定兩鎮練軍會同恩雲峯察看形勢一律加工數
月與新隄高厚相埒再籌添明垣廳及汎官河兵以防丁丑之汎等語具
仰成竹在胸事關上下游設防全局自應遵照籌辦惟春間東明鄉民因
脩隄滋事曾派譚鎮勝達帶正定練軍前往與開州協練軍會同彈壓協

力工作其時卽以練兵人數無多譚鎮等祇能彈壓未能幫工恩道諒已稟及今來示撮舉工段大略並未議明原隄四十里應加高厚若干又民脩之三十八里應加高厚若干又未脩之二十里應接築寬高若干然約計工程必大正定祇步隊二營大名開州祇步隊三營若令遠出工作除留守底營外共不過練軍二千名春分前去夏至停工僅三月能將原隄四十里加高加厚固已萬分喫力似未便勒限數月一律脩成此外練軍淮軍相去窳遠礙難檄調恩道才欠開展亦未能聯絡照料尤鴻章所不放心者若另起民夫增築必須巨萬之款直力更不遑及或請我公借箸一籌代爲 奏撥然亦必有撥無解轉誤要需鴻章再四籌思萬不得已能否先儘已有官隄酌設廳汛試辦脩守其餘俟察看形勢籌有經費再議接脩添設之處蓋東境南岸最窪直隄以上地勢漸高故往年漫決奪溜多在東境再上則至東明界石莊戶而止長垣老城無隄雖間有漫溢

而不至奪溜其害斷不及蘇境擇要爲之亦息事甯人惜費之道高明以爲何如聞俄考城一帶是否派歸德河北練軍助脩石土楷料是否由豫籌款均以爲念鄙見黃流變遷無常目前就隄設守尙是苟且敷衍之計絕非經久之謀得省則省藉免後艱仍乞鈞裁

十一月十九日復沈幼帥

補帆在臺染患瘴癘一病不起可勝痛悼 特恩加銜予諡建祠優卹稍慰忠魂兩生函告明春決意辭退以閩中同僚水火過深萬不可以久居乃竟真除是席義無可辭事更難處轉代懸慮各省關海防一項蒙咨令儘解北洋可謂能見其大前因執事尙未履任恐各處推諉觀望故咨行暫解敝處截至十月報撥寥寥茲奉檄催或可續收若干弟已行令津局無論解到多少專款存儲聽候籌商撥用明年夏秋赫德定造四船到津卽須動支至尊意有鐵甲船兩號若揚武者六號若鎮海者十號可成一

軍兩生函稱洋廠定購新式康邦機器一百五十匹馬力輪船不過十餘萬金閩滬兩廠所造舊式機器百五十匹馬力之船連工本員弁薪水合算約三十萬宜先派精通製造結實可靠之員攜帶工匠赴英德著名各廠學習造駛然後寄圖回華仿造與尊旨大略相同閩滬廠內當有製造之員派令率生徒出洋務求精心選擇籌議章程來年能隨同筠仙星使等前往則更有照應各船購集固難統領將才尤難閩廠學堂出身如有堪膺是選者並求示及揚武未聞過津定於何時出洋筠翁前擬乘駛此船旋又罷議戶部所撥海防額款本爲搪塞之計各關四成惟粵海浙海可稍勻撥而爲數無幾其餘各有緊餉各省釐金惟江西浙江可稍勻撥亦斷不能如數其餘皆無指望統計每年實解不過數十萬而總署與戶部又將南北洋籌備專款與各省之自願門戶者比而同之以致西林稱璜羣起而爭迷離莫辨十月杪總署函稱吉林奏添添練兵歲需六十萬一

經議准恐未能專顧海防又有自爲矛盾之意蓋諸公毫無定見徒以空文卸責事勢至此似可毋庸辨詰能得若干款項再辦若干兵船較爲穩妥前函所以先就陸軍整練正爲此也兩亭新募各營嫌太散碎將領於洋槍礮尤甚生疎餉力亦頗支絀似宜逐漸裁併吏治因上臺過於寬厚聞稍疲輟新政略加振刷必可改觀候選知府陳兆青膽敢造賣功劄訪求數年不得今幸獲解乞嚴懲之爲幸

十一月二十四日復沈幼帥

手示鈔件敬悉一一執事高掌遠矚燭照數計不數月間吏治軍政人心風俗必大轉移惟皖南北兵燹之餘歲饑穀賤生計益艱盜風益熾不能不仰望補救耳吳中財賦著名自軍興後協撥愈多曾文正與鄙人當事時往往翫置非得已也近年因淮軍未撤額餉不能大減議者不識源委輒謂本省之餉爲他人侵占究之部檄紛乘不撥於此則撥於彼亦何能

盡歸已用中原數千里伏莽可憂江海十餘省外侮尤可憂除淮部外更無大枝勁旅若內外可保無事水陸額兵略可禦敵弟必全行裁遣不欲自貽後累區區苦衷惟高明曲亮之樞垣無主持大計之人農部尤甚憤憤欲 朝廷力減不急之務無敢言亦無能行者如 三陵歲需二三百萬與京餉並重勢須設法騰挪此外則視緩急以爲勻付江局庶尙可支弟前函所請部議勿過拘泥者意固有所指也吉林練餉六十萬應由樞部議覆亦不過派南洋數省海防已成畫餅吉餉同歸無著但四成洋稅不可再分餘則聽其攪擾容俟奉文後再爲商辦補帆鬱鬱長逝閭帥疏中不一言其政績賴公表章名德幽潛亦爲感泣兩生當兼管臺事春間樞府早有此議但閩撫兼攝船政臺務未免能者多勞兩生精覈是其專長編急紛更亦虞叢脞昨方專緘規諫未知果采納否滇案初奏先將騰越廳鎮革職審辦差強人意惟威使云得證據由岑公主使家兄查無其

事仍與岑原奏情節略符頗爲威所剗計筠老未入總署時密請將岑公交部嚴議 寄諭滇中酌辦一時難成信獻洋界裁釐江湖添口自須力持但正案實未易妥結來春必尙煩口舌耳上海機器局應造船隻礮位及整頓學堂等要務乞大才主持飭遵爲幸

十二月四日復郭意城內翰

筠老到京卽蒙 恩權少司馬襄辦總署惟以密劾岑中丞之件外人不諒其苦心間有異議實則岑公不能無過 廷議亦難終爲曲護也家兄至滇先參騰越廳鎮極爲允洽而威使尙多缺望且埃續查如何情節方可定案尊論泰西各國均宜及時遣使與鄙見相符曾與總署籌及以使才難得尙在遲回昨又奉 旨派陳荔秋京卿與容蒔甫出使美國祕魯古巴等處專爲辦理華工事宜卽來示一人兼赴數國之意其有正副者爲久駐替代計至英國暨往亦派兩人則莫測其用意所在矣從前志孫

及崇地山奉使各賚 國書並非專爲游歷但不久駐亦無裨益目今精通洋務而結實可靠者實不多見執事知交徧天下夾袋中有其人否明年能否北游抵掌縱談欽遲曷已

李文忠公朋僚函稿卷第十七終